

խաց երկիրն, ոմն մեծ իշխան Բան Հարպուրդ գնաց ի վերայ նորա և կալաւ զնա. և կապանօք զրկեցաւ առ Թագաւորն Զիկմունդ Ակուսդուս, և Թագաւորն չարչարանօք եսպան զինքն: Եւ էր ինքն ստոյգ Շտեֆան պարոնին որդին. զոր և նշան այլ գտին ի վերայ նորա:

1565. ԹՎ. ՌԺԻ. Ապրիլի ամսոյ Գ. Վաղճանեցաւ պարոն Հրիհորն՝ որդի Զատիկի, որ էր զլուխ ժողովրդեանն և առաջադէմ ամենեցուն. և էր սիրեցեալ յայս Թագաւորաց և ամենայն իշխանաց և մեծամեծաց. զոր բազում բարութիւնս և երախտիք թողեալ Հայոց ազգին իւրոյ. զոր 25 անկամ ի Թագաւորի արքունի դուռն գնացեալ վասն դատաստանի իրաց, զոր կամէին Խլախ ազգն ափշտակել ի ձեռաց Հայոց, և նորա գնացեալ ամբացոյց և հաստատեաց զՊատաստանն (Պատաստանագիրք կամ Օրինագիրք), զոր այժմ ունին Հայոց ազգ, և խաղաղութեամբ և հանտարտութեամբ վարեն զկեանս իւրեանց, ողորմութեամբն Աստուծոյ և Թագաւորին, և պարոն Հրիհորին ջանիւ և հոգաբարձութեամբ: Զոր ողորմածն Աստուած ողորմի իւր հոգուն և զմեզքն ջնջէ, զկամայ և զակամայ. և իւր սուրբ արքայութեան արժանի արասցէ հանդերձ իւրովք արեան մերձաւորօք. ամէն:

1566. Հայոց ԹՎ. ՌԺԵ. Յուլիս ամսոյ ԺԵ. Փառք Աստուծոյ Հօր անմահի, և Որդւոյն Աստուծոյ միածնի, և Հոգոյն Աստուծոյ ճշմարտի. այժմ և յաւէտ յաւիտեանս. ամէն: Եւ արդ պարտ է և արժան է մեզ՝ զայսպիսի ամենայն ինչ գրով աւանդել. զի առ ապա եկեալքն ընթեռնելով փառս տայցեն Աստուծոյ: Եթէ որպէս հրամանն Աստուծոյ եկն ի վերայ մեր՝ վասն ծովացեալ մեղաց մերոց. այս ինքն է զոր եղաւ յայսմ ամի ի կամենից քաղաքիս, մեծ և անողորմելի ցասումն մահուն. ոչ թէ միայն ի վերայ մանկանց տղայոց, այլ ի վերայ երիտասարդաց և ծերոց, զոր ամենայն օր ի մէջ Հայոց ազգիս ութ և ինն և մինչեւ ի տասն հոգի ի հողն թաղէաք. և այս երկարեցաւ ի յուլիս ամսոյ մինչեւ հոկտեմբեր: Եւ այլազգիքն Ֆռանգ և Բուուզն՝ ամենայն օրն մինչեւ ի 60 հոգի թաղելով ի հող դնէին: Եւ զի էր դառն և դժար ժամանակ, զի ոչ ոք ի քաղաքս ոչ գայր, և բնաւ ի քաղաքացոյն զօք ուրեք չէին թողուլ. մինչ որ քաղցրութիւն Աստուծոյ յայտնեցաւ ի վերայ մեղաւոր ծառայից իւրոց: Եւ զի էր ահագին ցասումն, որ մինչեւ երկրորդում և երրորդում օր ողջ և առողջ զուով մարդիքն՝ ի հողն դնէին. բայց Աստուծոյ կամքն օրհնեալ եղիցի. զոր նմա փառք ի յամենայն արարածոց և ի մէնջ: Զոր ինչ եկն ի վերայ մեր՝ վասն մեր չար գործոց և անթիւ մեղաց մերոց եկն. զի զոր ինչ ետուր և զոր տալով է, զոհուութեամբ ընդունեմք և ընդունելոց եմք:

1566. ԹՎ. ՌԺԵ. և սեպտեմ. ԻԳ. Աստուած ամենակալ ողորմի Պար. Հրիհորին հօգոյ. զոր նորա արդեամբք բարեպաշտ կինն իւր Բանի Ազիզը՝ զհրաշալի տաճարն Սրբոյ Նիկօլա մեծացոյց, և այլ վայելչապէս զարդարեցոյց և զեղեցկացոյց, ի փառս անհաս աստուածութեան Տեառն մերոյ Յիւս.